

宋詩紀事補遺

宋詩紀事補遺卷之三十二

歸安陸心源伯剛父輯

呂希純 屬有

千峰樹

古郡千山裏高臺六月涼
開軒背城市伏檻卽林塘
白佛當平遠烏龍插昊蒼
水風生枕簟嵐翠撲衣裳
欲雨高峰暗新晴瀑布長
稻塍分錦繡松嶺奏笙簧
自昔多賢守于今載雅章
承流叨繼踵主諾祖提綱
夙樂阿蘭若端居最上方
南津有禪侶默坐正相望

紫翠樓

予臨瀟洒郡終日坐樓中樓上闢四門門開面面風
南榮看馬目北檻對烏龍夕暝瞰巽率朝霞望高峯
峯巒鬱相望紫翠千萬重中霄若笙簧天籟起長松
直疑列仙侶駕鶴相過從

趙清獻賞春亭

遺直兼遺愛居今見古人殿中收白簡江上擁朱輪
棟宇才函丈琴尊喜對賓遶亭佳木在長與物爲春

烏龍寺

秀嶺奇峰接釣臺烏龍直北更崔巍萬松合處虛亭
敞千佛光中梵宇開林外瀑泉飛朔雪雲閒寶藏轉

春雷攀藤更入西菴路一聽支郎語劫灰

承天思范軒

范公當日守江濱本是西清獻納臣蕭洒溪山蕭洒
郡太平天子太平民棠郊遺愛今仍在竹榭高吟迹
已陳還憶開元宋開府相望彷彿見精神

陳尊宿菴

尊宿名方盛菴巖迹未殫纖蒲隨日用儋版喚人回
臨濟親推出雲門手托開于今兩禪派俱自睦州来

靈香閣

昔聞僧道開清淨本求佛談經悟教藏施藥蠲眾疾

臨嶂起重閣最上構禪室靈香邈可繼壯麗固已軼
桐廬蕭洒郡茲閣更奇崛峰巒互掩映松竹富蒙密
我來一伏檻紫翠競森出塵襟與羈幘中坐恍已失
清風來甚遠冲氣久彌逸東軒視蟠桃仙路如彷彿

蕭灑亭

郡因賢守得佳名水態山光會此亭雲外僧歸穿竹
鳴日邊鷗下集沙汀浮梁倒影橫雌霓寶塔張燈疊
萬星不獨班春行田野重緣香火叩禪扃

高峰菴

予嘗登高峰近瞰碧溪鳴老松如卧龍夾道忽騰翥

危梯過百折直下看雲雨善導有遺蹤十佛從口吐
歲久缺其三塵埃誰復數佛壽儻能續佛像諒可補
遠山行道跡會轉坦無阻中休有磐石蔽日多林莽
安得德山流來爲此峰主結茅孤頂上端坐訶佛祖

玉泉菴

瀑布巖東轉畫旗拂雲穿石上霏微抱溪脩竹通千
箇夾道喬松過十圍簷外一潭泓翠碧窻間萬斛潑
珠璣使君不用笙歌擁漱玉聲中岸幘歸

江氏園

北渚南津路不遙鳴騶喜過定川橋竹間水榭涵虛

碧林外山堂對沈寥地占上游真爽塏門通禪苑離
塵囂遊人未嘆羣芳歇石磴杉松正後凋

民表圓同菴

翠竹庵前久不疑雨花巖畔更忘機何人得似江居
士在定時多出定稀

定川門

江如丁字湊城隈長畏蛟龍鼓浪來門表奠川聊致
禱職當求瘼愧非才兩灘漲定沙痕白七里山晴霧
雨開放出庾家樓上月卻留賓從少裴回

王氏亭池

城外溪山知幾重獨憐池館占城中亭花不動波瀾
細逕石相連島嶼通牀下細船同醉傳尊前垂釣似
仙翁王家最數烏衣巷莫廢江南舊士風

朱氏園

十里遊山興盡回重留車騎歛郊扉中橋駕石臨清
港危榭開軒挹翠微夾道松風吹酒面滿庭花氣襲
人衣殷勤更謝華亭鶴引吭高聲送我歸

以上嚴陵集

賈公望

字表之獲鹿人昌朝孫資稟甚豪嘗謂仕宦當
作御史排擊奸邪否則爲將攻羌戎累官蘇州

通判

朱花石

倏忽向六十萍蓬無奈何丹心猶奮迅白首分蹉跎
正直士流少傾斜朋數多陽光一銷鑠不復見妖魔
賈公望字表之嘗爲郡通判時朱勔父子鼎盛
奔競者爭趨其門公望疾之有詩云云勔之子
賜金帶公望亦衣三品服偶次朝拜會天慶觀
中朱從者見公望所佩魚睨而視之公望厲聲
叱之曰此是年資得來非緣花石左右皆錯愕
朱大銜之竟擠之罷去

吳都
文粹

石汝礪

字介夫號碧落子英德人五經多有講說於易
尤契微妙晚年進所著解易圖於朝爲王荊公
所抑蘇東坡謫惠州相遇聖壽寺談易大異之

竹浦漁歸

釣罷收綸日旣殘扁舟一葉解登灣長歌歎乃乘風
去鳴櫓咿啞趁月還翡翠躍飛紅蓼內鴛鴦驚起白
蘋閒奔馳馬足車塵者回首煙波羨爾閒

粵詩苑逸

榮諲

字仲思任城人舉進士累官廣東轉運使宋史

有傳

句

城下江流金鴈水亭中人弄五絃琴

輿地紀勝

曾安強

大和人登第後坐耶黨八歲能詩

賦白鷺

其外殊潔白俯風臨清流其中乃貪穢盡日魚蝦求

輿地紀勝

范正國

觀山

秋日淡平野秋風吹客衣駕言適西郊籃輿穿翠微
觀山隱精舍籍甚涪翁詩竭來訪陳迹古木蔽柴扉
寒泉湛秋氣亂石響前溪高峰抱薌薜右殿倚傾欹
同來得湯沐漸喜與世違遙憐二三友結約空前期

吉安府志

彭乘

字利建華陽人第進士歷官翰林學士知制誥
宋史有傳

蒙泉

湯湯散作家家惠莫與貪泉一樣看

與池紀勝

孫旦

穎昌府長社人哲宗時以子永貴贈銀青光祿大夫見蘇魏公人

送僧歸天甯萬年禪院

詔到禪關日願言高古今幾生傳佛法方得契君心
結坐觀宗社恩容返道林豪身名了也何處更追尋

天台
續集

淳于震先

銅陵知縣

憶故鄉

何時歸到望仙鄉蓬萊縣有望仙鄉青鸞里故舊相迎興味長
六月海風吹溽暑瓜田白酒稔清香

其二

蔚陽山下祖塋居魏嶺崇高畫不如離亂不堪回首
顧春秋誰爲掃墳廬祖塋在蔚陽山

其三

積年祖宅隱黃山門外槐根出地盤其祖宅在黃山幼子孤
遺音信斷常時思憶倍辛酸黃縣志

孫子實

與秦少游同時

秦觀秦觀寄寂軒

薛宣欲吏雲季氏或招閱此分冒中秋萬物既收糴
賈藥偶知名草玄非近準才難不易得志大略細謹
士生要弘毅天地如蓋軫驥令鹽車驂井下知綆引
難甘吁爾食聊寄粲然輟誰能借前籌還婦用束蘊
吾聞調羹鼎異味及粉糧豈其供王羞而棄會稽箒
危驂

知復州軍州事

挽故知容州朝請陶公二首

今代平塘老前身靖節翁直心行杲日清得照寒空

樂道簞瓢外歸真軀殼中政應高扁慕百世使同風
巴陵三載掾太半並棠陰僕守濂溪訓公推靖獻心
迨更深夜簞茹納昔時金引領西山路天風淚滿襟
見平塘集

危彪

太學發解進士

挽故知容州朝請陶公

世態紛紛等觸蠻惟公打透利名關八州不作士衡
夢三徑謾爲元亮還苦淡平生安北巷孤高一節照
西山想應精爽難埋沒只在青松白石閒

見平塘集

司馬康

字公休文正溫公之子舉明經累官司諫直集
賢院

寒食上塚至瀾洄莊追思祖烈感而爲詩

祖學當年向此勤子孫今日繼清芬賢能自過高陽
里尊寵無慚萬石君花滿一州紅蕊亂渠環千頃翠
波分高門駟馬流餘慶當見吾家世有聞

以上山
西通志

劉濤

字普公南安人昌言孫工書及草書蘇軾跋其
書謂奇逸多才徽廟召入禁中以不稱旨而退

晚年困躓讀書靈泉院自號靈泉山人

延福寺

唐時賢士今何在晉代青松獨此存往事悠悠何處

問金鷄山色又黃昏

泉州府志

處士林知墓

處士墳三尺吳山松萬株空餘著書業不見煉丹爐
道古難言合年高勢最孤清朝禮樂備無處用真儒

思古堂

今人思古不如古後代思今亦似今古往今來祇如

此溪山傷盡幾人心

泉州府志

白雲巖

白雲巖在白雲閒巖下千山與萬山莫向公卿容易

道恐伊來此一生閑

泉州府志

許杭

江西轉運使

咏麻姑山

數里岩龔落日西更高高處種靈芝危峯受雪春歸
晚怪石留雲雨到遲仙鹿避人眠淺徑野禽窺果啄
殘枝待應俗格消磨盡重建瑤臺舊路歧

重刻麻姑山志

王肱

建中靖國元年知撫州

瑞蓮橋卽九曲池

蓮橋琢石跨松蹊滿院眞香種木樨欲得淡軒談夕
照須將明水洗沉迷雲峯黯黯巴猿嘯竹嶺蒼蒼杜
宇啼從此邦人知勝概爲師增寶此招提

撫州府志

譚粹

字文叔滇江人朝散大夫建中靖國辛巳知廣
東英州軍州事

建中靖國辛巳八月十日獨遊碧落洞遂成拙
句

五言三十二
碧落嵯峨石室幽到難嗟我未嘗遊兩崖捲束雲華
滿一水通流秋色浮宛矣壺天延日馭凝然乳竇滴
泉旒徘徊注目孱顏久疑有眞仙在上頭

望仙亭成再書一絕

一亭新構聳崔嵬水墨屏圖四面開洞口白雲無鎖
鑰世人尋勝任頻來

重建南山亭榭輒成小詩迺建中靖國元年孟
冬五日也

南山亭榭復修完上枕蒼崖下碧瀾此景詩人吟不

盡丹青圖寫也應難

廣東通志

景泰禪閣

二山相傳成禪閣出山半仰觀青冥逼俯見白石梁
錫杖湧玉泉鐵橋通銀漢巍然槩諸天恍若登彼岸
無人解菩提松濤自昏旦

粵詩蒐逸引
羅浮山志

江公望

厲有

題釣臺

漢柄久顛置神鼎遂移新志士恥驕餌入山如避秦
中興有世祖仄席在幽人玄纁載安車三反方來賓
枕漱泉石久不羨北軍細卧屈萬乘尊咄咄平生親
箕穎志不奪槐鼎意從申歎息上輿去天子不得臣

歸隱富春渚釣外無隱淪高名懸日月清風播松筠
至今七里水不到南海津南海有貪水至今雙石臺獨與
西山鄰古木下高鳥清漪行素鱗溪氣綠靄靄野蔓
青緡緡客星照千古鄧萬安可倫手促玉璫去出處
各有因玄素久寂寞猿鶴叫秋旻

題方氏清芬閣

一室翛然劇翳荒嘯歌曾是傲羲皇春風自逐桐花
老煥日時聞藥草香脩竹幾年薶舊隱新詩到處發
潛光從今應與嚴家瀨相對清芬一水長

梵率寺鑑光閣三首

高下人家隱亂峰
澹雲籠日水浮空
朝朝莫莫山容改
總屬虛懷一照中

皎皎長空迴絕塵
青山雨後更逢春
一匱古鑑新磨就
誰是光明內外人

風吹宿霧寶匳開
滿目春容甚處來
好值軒轅磨瑩手
更無一物隱纖埃

玉泉菴二首

高蓋西來動四鄰
青青豐草馬蹄勻
平田淺水相因足
野杏山梨次第春
偃蹇長松如傲世
譴呼好鳥似迎人
翛然偶得棲真地
方信浮名卽是身

十里五里花無主
千山萬山春自忙
少年意氣傾都市
走馬橫來若電光
泠泠古寺風吹屋
羞死五陵豪俠塲
黃金散盡身無益
獨有泉聲千古長

再題

逸士有高躅
故山無世情
黃花香麝落
白馬豬清明
雲作朝昏暝
泉流今古聲
王孫好歸去
芳草又重生

又題玉泉菴三首

僻鳴藏亂峰
清流陰脩竹
短策資遠遊
斗酒招近局
幽草不知名
孤花送餘馥
采芹蹋青泥
捫松憐舊綠
寄言潁川子
沒齒傷跼促
爲君泪其泥
與我濯纓足

落崖碧水支流去隔竹黃鸝相應鳴飛絮落花迎野
步細風輕煥爽人情

天台大士碧峰頭林鎖檀烟凝不收誰坐胡牀揮玉
麈一聲清磬晚悠悠

以上巖
陵集

多暇亭十律

地勝雲霞府花繁錦繡川牛羊帶殘照井邑聚雲烟
作吏如兼隱爲儒也解禪了然無箇事安坐自調絃
青山沈暮靄白石漱寒流市有州從事門無郡督郵
文書花下吏衙鼓柳邊樓不是鋤奸手無心強項侯

日上欄杆迥雲分邑屋疏綠搖風櫺柳紅浥露芙蓉
客少清厨傳年登足稅租題詩寄潘令何必賦閒居
朱甕淨天宇碧樹照山光涼思生簾額晴嵐入羽觴
燕忘花落座魚動日翻梁酩酊還歸去誰能向葛強
邑古人烟少身閒體力便看書新棐几兀坐舊青瑣
樹密深移影爐寒細裊烟何須賦歸去斗酒且窮年
水外鶯塵盡花間晝漏遲壯懷無怗惚退食自委蛇
掣手莫予困折腰甘爾爲逢人遭白眼開口托清時
松榕寒不老天水遠微分萬壑秋聲肅千家晚色曠
漁舟輕破浪樵唱靜披雲安逸原無補耕夫愧爾勤

萬象舒人意，空虛靜客魂。行雲時挂屋，歸鳥誤投軒。
落日孤村墅，西風百草原。頽然北窗下，炙背復何言。
天幕低秋色，雲屏列晚陽。稻梁飛雁驚，邱隴散牛羊。
潏潏看魚樂，悠悠夢蝶狂。太平無以見，但有日舒長。
自來多暇裕，萬法體如如。簡易人情裏，平常心地初。
振裘原有慶游，乃本無餘下。得無厭手縱橫，始見渠
以上見永
春州志

朱師復

建中靖國中爲廣東經畧

斗南樓

危構參寥廓星躔耿北窗戰餘塵沒馬魚散月澄江
遲暮憐孤客寬閑樂此邦坐中詩有待端欲受誰降
廣東通志
古蹟畧

張守厲有

建炎丞相成國呂忠穆公退老堂詩

大老歸周慶有源中興吾宋屬雲孫五龍夾日三辰
正一虎當溪百獸奔何事雲山遽招隱向來金鼎厭
調元追鋒早晚求黃髮三徑還荒靖節園

聞道抽身向急流海邊暫艤濟川舟功存社稷推元
老人向漁樵識故侯綠野江山供笑傲赤松儔侶伴

淹留閑棋小酌懷疇昔清夢時追杖履遊

天台續集別編

虞謩

崇甯元年浙東提刑政和中再任

淨土院

法界惟心現眞風觸處涼具茨非有路建德豈須糧
地僻遠塵世境幽聞妙香此山斯淨土不必往西方

天台續集

王世輔

崇甯元年知樂平縣政成訟簡民懷之

石門

洪巖仙跡甚多今僅存詩六首

巖穴神仙宅山門向嶺開時橫雲作錦怕有俗人來

石金剛

天地應憐我遺留鉅力神定須憑堅手神妙與傳真

仙人臺

任峻我須上更高人亦行神仙雖已往咫尺是蓬瀛

石猴

猿猴嘗學禪立德固堅久能乘獅子遊不爲獅子後

山風

山露濕吾履山風吹我衣白雲裹舉處依約認崖扉

石山雞

山雞化爲石錦翼已成藏俗類休爭食吾心不爲梁

樂平縣志

彭迪明

崇甯元年宣義郎知興平縣

留題淨相院橙軒

萬葉扶疎雙幹脩植臨禪坐色長幽影分渭北千家
月香散山南一檻秋清液冰寒承露結圓包金重帶
霜收會應登列西州貢庭實甯無橘柚羞

金石萃編

陳壽朋

字天固長樂人崇甯二年進士官諸州文學

望海亭

謾指亭前柏西來意自深
迷人終著景達士了忘心
六葉傳真諦微言振道林
法門應不二來此默追尋

長樂縣志

何亮

浙江西安人崇甯二年進士

劔閣

千峯如劔列虛空
曾隔車書混不同
安得乾坤作鑪冶
鑄爲農器散寰中

輿地紀勝

曾弼

章貢人幾之兄崇甯二年進士提舉京西南路
官終學士

題房城驛

萬山飛不出有屈向誰伸寄語絃歌宰留心且爲民
與地紀勝

林震

字時敏號介甫莆田人崇甯二年進士累官知
濟南東平府廬陽汝洄蘄新濶泉九州著有集
句詩七卷文集一百卷禮問三十卷易傳十卷
易數三十卷易問五卷經語千字文一卷

山寺晚春

青山有恨花初謝流水無言草自春

莆陽比事震長子集句凡所用詩三百八十家嘗有客舉陽關詞勸君更盡一杯酒令屬之震曰與爾同消萬方愁

鄭南

字明仲福建甯德人崇甯二年太學釋褐官國子司業知泉州移福建兩浙提刑終修撰

錦屏峰

霍童住境本天成十里蓮花遍處生山色依然仙不

至月明徒自憶吹笙

甯德志

彭路

字通吉崇安人崇甯二年特奏及第

謝恩

聖主求賢軫念勞臨軒策問萃時髦龍麟日繞天顏
近螭首雲移帝座高疏草披丹陳紫禁宮花錫采晃
藍袍自慙朽芥叨榮遇報答能忘聖語褒崇安縣志
朱勝非厲有

石通洞

涪翁詩名垂宇宙李杜摧鋒君殿後山川草木經品
題千古佳名長不朽中年微累黔中口石通曾運義

之肘不獨鄉人敬重之神物堪持百年久我昔語溪
口崖遊敬誦君詩三四首至今聲價重瀟湘一字千
金猶未售石通當在伯仲間更藉文人開
口施南府志

王萼

晉江人崇甯二年特奏名

西軒

步躡霜莎入梵宮一軒佳處屬支公
剩開青瑣延明月疎植修篁待好風
笠澤波聲春雨裡洞庭山色夕陽中
江頭景物牢籠盡欲寄琴尊此養蒙
吳都文粹續集

張稟

山東歷城人崇甯三年朝散郎知四川渠州軍
州事賜緋魚袋重摹馮緄碑

資州

資中佳處是東巖只在軍城五里閒四座清風無俗
景我心渾似白雲閒

輿地紀勝

儲惇敘

字彥倫福建晉江人崇甯五年進士調龍溪丞
知甯德縣多惠政民爲立祠累官賀州通判著
有玉泉集

仙湖

咫尺天湖號堵坪先賢曾此勸農耕若教一日歸豪
右敢向黃公廟下行甯德志

吳偉明

字元昭邵武人崇甯五年進士累官崇德尉知
興化軍紹興八年以左朝奉大夫知徽州累官
直祕閣

絕句

毒蛇猛虎空相向鍊壁銀山謾自橫長笛一聲歸去
好更于何處覩疑情羅湖野錄

蘇元老厲有

字在庭號九峯崇甯五年進士

贈撫琴劉伯華

劉伯華善琴秋抄來訪適有感於余懷因書
數語寄意以贈之

公子方年少絲桐長有名曲雖仍舊譜指要發新聲
澗落泉初響風清月正明起予千古意惻悵不勝情
贈基士兼相

峩峩遠遊冠過我田里居手談達要妙心計有卷舒
把握殺活機操持開闔樞總總如亂兵紛紛若奔車
觀者皆怵惕敵人更擲掄一著起疲廢萬口驚喧呼

朱詩三十一
巧思自神授智慧非常拘又聞風鑒精許與且不渝
羣公贈詩文稱述良非虛自昔少兼能今挾二術俱
奕秋與許負異世同一軀惜哉惟藝名問學當何時
截江
綱

梅執禮 厲有

滁州希真堂並蒂菊堂久無菊頃念文忠直
手植之語爲致數本遂皆並蒂而花作四韻
記之

前輩風流掃地空秋香無復伍春紅旋培數本當幽
砌忽作雙英滿翠叢可但斷金私雨露故應連璧儼

霜風得來稱瑞無輕剪留此甘棠壽薛翁

宣和四年東陽梅某出守蘄州以五月十九
日宿齊山谷黎明奉親朝謁真源萬壽宮少
休五雲寺賦此

灑高風折抑好想嗟末員邂逅一麾出安輿奉華顛
駸駸涉勝境獲締香火緣徘徊廢基殿稽首頌堯年
徐步俯松杪幽尋值靈篇軒窗散急雨四座屯非烟
向來玉京夢了了墮目前恍疑雞犬資今在第幾天
平修無愧怍自聒應得仙孺子審可教凡軀仁加鞭
敬鄉錄

黃薦可

字宗翰霞浦人崇甯五年進士戶部郎官知梅
惠二州終朝散大夫

資福寺

一逕崎嶇步翠微亂山深處掩柴扉烟蘿密瑣人家
少碎石峻嶒馬足稀泉跳浮漚員復散人生幻夢是
還非何時識此林泉趣飽飯參禪向上機

福甯府志

黃銳

江西南城人崇甯五年進士南宋時瑞州司戶
參軍知高安縣

又湖南興甯人淳熙二年進士

眉田山

一嶺復一嶺一巔復一巔步邱皆力穡掌地也成田線引山腰路斜穿石眼泉眉山同是號此處合生賢

泉州府志

鄭叔僑

興化人官承議郎元豐八年進士知清溪縣

熙甯橋

千尋水面跨長橋隱隱晴虹卧海潮結駟直通黃石市連艘橫斷白湖腰

興化府志

宋詩紀事補遺三十二男侍讀銜內閣中書樹藩校

宋詩紀事補遺卷之三十三

歸安陸心源

李邴 厲有

建炎丞相成國呂忠穆公退老堂詩

晉公伐叛致太平歸來綠野勤經營沈淪不復經濟
意晚節更爲人所評文饒佐武取河朔平泉草木羅
清英功成未嘗一寓目鑱石作記空傳名何如堂堂
渭川老倔起自與天扶傾歲在作噩駭機發忠臣憤
叱思殞生氣埃不爲紫霄蔽日月卻向黃道行壯年
鐵衣勤汗馬白首金鼎調和羹張皇國威起頻壓約

救吏蠹歸章程羌我破胆思尋盟盜賊脫甲來輸誠
轅門諸將指呼耳公有胸中十萬兵銳然諸老樊小
圍爨席卻與漁樵爭烟霞放目傲軒冕水石步履遺
機衡雖然四海望不置褰旒下矚熙皇明宣王于今
事北伐周公不日歌東征迎還兩宮天地慶掃灑六
合風塵清是時公歸迺可耳豈得遽適義皇情祝公
壽考如衛武百歲箴儆謀羣卿祝公功名如郭令身
與廟社同安榮忠誠向來金石貫勳烈遂將天壤并
他年升堂奉杖屨願留隙地誅柴荆但令公孫肯開
閣不用野王來撫箏

徐偉達 一作遠

新城人崇甯五年進士

碧沼寺

古寺登臨不記秋重來景物更清幽
烟籠野色穿牕入竹引寒泉
邊砌流社閣諦觀緇侶肅蓮堂
時有妙香浮老僧喜客殷勤甚
冰簟蒲團爲我留

新城志

侯延年

衡山人崇甯五年進士官荆湖南北鈐轄使

靈巖故宅

十年辛苦唐賢士千載奇觀舊石巖
天籟沈沈山月

小夜深文字與誰談

沅湘耆舊傳

歐陽子槐

郴州宜章人崇甯五年進士參知政事

遊開山寺

高平北路入禪堂行轉茅岡上石岡壑險橋危需一
葦山深樹古立千章禽聲噤噤如簧巧溪曲灣灣似
帶長我欲拂衣登絕頂低徊吟嘯白雲鄉

沅湘耆舊傳

林煥

莆田人崇甯五年進士知連江縣

濂溪

我來濂溪拜夫子馬蹄深入一尺雪長嗟豈爲溪泉
廉化得草木皆清潔夫子得行萬古師坡云廉退乃
一隅有室旣樂賦以拙有溪何減名之愚水性本清
撓則濁人心本善失則惡安得此泉變霖雨飲者猶

如夢初覺

湖南通志山川

林伯顯

莆田人崇甯五年進士累官國子司業知泉州

謁聖林次韻

生民未有如夫子好學皇皇最自強功業當年雖坎

壑聲名後世愈芬芳

關里志

顧文

鄞人崇甯五年進士官郎中

三江亭

詞源倒峽勢奔侵
綆短那堪汲萬尋
望屬滄浪驚鶴淚
志存流水識琴心
揮毫句句囊盛錦
拜賜人人袖有金
不日都俞在廊廟
更聽虎嘯應龍吟

四明圖經

石端誠

新昌人崇甯五年進士

題宴坐石

飛流噴雪散層巒
瓊水無時瀉屋簷
客夢夜回疑是

兩起看窻戶有明蟾

天台續集

黃友

字龍友平陽人崇甯五年進士辛卯方臘反攝
蘭溪金華二邑寇不敢犯累官直秘閣通判澶
州時郭藥師軍叛諸郡響應友率數千人與戰
躬冒矢石至破唇缺齒奪路詣京師李綱薦之
欽宗召覩其面嗟歎良久進直徽猷閣制置司
參謀隨种師中解太原圍士卒奔潰友被執罵
不絕口寇以脂蠟塗其身倒豎焚之時年四十
七詔贈中大夫

詠風 七藏作

不假元冥力乘空散寂寥
聲雄秦塞鼓勢撼浙江潮
落日岬山嘴浮雲亞隴腰
鵬程如借便九萬看扶搖

輓高都獲

粉身碎骨勇無難祇爲君恩重
泰山風淡月明都護
府功名千古在人間

平陽縣志

徐衡

字季平江西樂平人崇甯五年武舉異等廷試
第一授右班殿直知晉甯軍吳保寨累擢江東
提刑重和元年秋諸路大水衡任賑濟多所全

活尋提點廣東刑獄降巨盜劉隆改提舉京西
保甲高宗卽位轉康州防禦使有雜著三十七
卷

贈彭神童

吾家先世有童子姓名嘗著杜詩史不緣神氣形相
殊安得公詩重褒美三百年來有宋興妙裔四海皆
豪英番郡自古稱多士羣見頭角又崢嶸泊水之東
有彭氏生兒五歲眞佳瑞雙眸點漆肌骨清不與孩
提共嬉戲誦詩記字何了然琅琅一口千萬言弱不
勝衣行未穩凌人氣岸已軒軒嗟予去國亦云久爲

報君恩矢奔走繡衣持節入閭閻大半故人新白首
與兒阿父昔同遊高才終不事王侯報不在身當在
子發源所與今其流行看直上青雲梯決取鐘鼎如
探囊中籌

自題仁壽樓

百尺樓成接昊蒼御題仁壽間行藏四端所有雖爲
貴五福爲先孰敢當日出千山凝曉色花開十里帶
秋香老來意外無他念贏得登臨興味長

樂平縣志

權邦彥

字朝美河間人崇甯中上舍登第紹興中果官

簽書樞密院事嘗獻十議以圖中興著有瀛海
殘編

二月九日遊百門泉覽□由殿院有詩刻石
因用其韻書之并律詩奉呈

西山□人巧相逼興欲乘風先兩腋犯寒策馬古其
城未見春林眩紅碧土膏浮焰遠汙汙野燒舊痕明
皦皦造幽忽覺果物異心瑩如澄眼如拭山根出泉
泉湧竇泓此一樣玻璃色炯然髦髮立可數我欲採
之還杖植酈元水經陸羽品甲乙未許來輕敵徑須
乘夜□□□□試飛橈撥雲跡寒垣奔□□長□□

帽多塵更吹炙偶來娛此得閑曠塵土自無何用滌
境清意徹兩相會坐對行吟一傾臆鷗鷺飛浮亦閑
暇知我忘機羣可入擬將筆力出□□□□才□費
雕刻荒乘野逸不知倦是樂箇中真自適暮歸穿邑
驚市人應笑新邊二千石

又

眼看綠淨思悠哉縐縠圓珠串欲裁舡穩恍如雲外
去鳥飛驚自鑑中來泚融陂浸秦山碎威沸泉滎濟
水回何似此閒弄明月月中長嘯有高臺以上
石刻

浙源山 一名浙嶺

一抹冷雲遮嶺半千章古木滿崑隈山深林合失昏
晝路轉溪迴迷去來鷹隼翻空何事擊猿猱緣壁爲
誰哀此行步步山寮界歸雁詩圖相對開

徽州府志

樂平道中

稻米流脂薑紫芽芋魁肥白蔗糖沙村村沽酒喚客
喫並舍有溪魚可叉枹鼓不鳴盜賊少雞豚里社語
聲譁賽神還了今年願又整明年龍骨車

樂平縣志

張翥

字文叔南京人方平之從孫登崇甯第宣和元
年朝散郎通判台州建炎初知邵武軍

題東湖二首

有碑在堂壁上

解慍薰風拂面涼
藕花極目送清香
三千宮女青羅
蓋都作酡顏酒暈妝

蜀錦誰將到海涯
水仙鋪作地行衣
回隄卻似元宵
路拋擲紅燈載月歸

天台別編

張深

雙流人崇甯登第累官夔州路轉運判官除潼
川路提點刑獄改轉運副使遷知夔州建炎三
年以端明殿學士知熙州徙知利州充本路兵

馬鈴轄安撫使

繫年要錄

馮城開元寺留題

本自無涯宦海游如何杖策訪田疇
太平豈是渾無象兩兩耕夫話有秋

成都文類

江常

字少明晉江人崇甯五年進士仕給事中帥福州紹興中左朝散大夫充徽猷閣待制提舉臨安府洞霄宮八年卒于泉州

繫年要錄

有外制十卷

文集二十卷

建炎丞相成國呂忠穆公退老堂詩

玉室璿堂奉宴居醉吟風月在方壺山川大抵因人

勝出處由來與道俱斟酌古今歸奧學扶持宗社屬
嘉謨區區卻笑陶元亮祇把南山入畫圖

天台別編

汪藻 厲有

天台道中

渺渺孤程逐鴈飛茫茫平野見人稀
水紋縈石作蟲篆麥隴挂山如衲衣
日月尙留滄海照山川盡護翠華歸
春風自滿江南岸不管人間萬事非

呂丞相自天台寄示退老堂詩卷賦此

心如金石氣如虹整頓乾坤指顧中
挽去甃成調鼎事歸來還作釣璫翁
東山勝踐今人見西洛耆年幾

客同圯上一編渾未用赤松那得便從公

我公英爽笑臞仙來占東南古洞天幾度傾身安社稷一朝袖手向林泉長勞海內簪纓望小作山中杖履緣謾使吳兒生意氣涼臺燠館記他年

天台續集

朱昇

江甯人崇甯進士

迎奎閣

半塢煙霞金世界一堂風月玉壺秋

輿地紀勝

張擴 脩有

次韻大年姪見贈古詩二首

人生幾何時心地要平曠不須意外求辛苦尋蒟醬
此即有高處智出百夫上禪窗接輒語眉宇春盎盎
詩壇久失律齋戒欲謀將誰專筆陣功定起太公望
君文秋水篇曲士差臆度吾文元尙白窮老甘寂寞
向來失宗盟士氣日卑弱後生苗未秀況復病草惡
如君真挺特文士獸一角頭風吾何憂解后當勿藥

次韻周嘉仲刑曹簡航師食筍

籜龍豢不得託根暫神奇忽化清淨供結緣貧導師
回甘溢齒頰常帶泉石滋要知服食功不減瓊田芝
此君淡難交挺挺如立玉何意昆仍中爲人償口腹

羣嬰脫錦襖珍勝麝項肉猶堪作味諫沒齒蠲脂毒
長櫬太寡恩斲喪東南美至今管城封濫罰及孱子
例求一赦貸餘潤乞松髓周旋南董手罵賊到盧杞
周郎清而臞菜把助嚴苦盤中玉離離醞釀冰雪語
向來幾詩亡徑欲就君補請讀食筍篇微言皆可咀

送次公姪從辟顏拱衛軍中

結髮事師友投身翰墨場技成忽棄去短衣親戎行
平生萬卷書豈無活國方不如口擊賊對面用所長
顏侯將家種勇過王鐵槍螯弧每先登裂袂裹箭創
得君如敵國辟易未易當中原干戈滿秉國藉棟梁

誰專發蹤策坐待錐脫囊事平各分功千級歎莫儻
位卑君勿言儒雅故自將會從僉籍中微見破敵章
讀卷有感

巧言互一律紛然如銛鋒揮筆餘萬言積案成千重
誰令繆悠子持衡居其中兩目病且昏不辨牛馬蹤
而使視試文豈能分雌雄往時心力彊眼明耳猶聰
本欲籍科舉脫此文字攻一朝反自縛身隨蠹書蟲
負郭有田園猶存荒菊叢頻年秔稻熟酒賤尊不空
何不駕柴車遠揖陶令風作詩請伯氏林下相追從
次韻何任叟正字館中試茶

金祥畏稱檳榔珍走食未辨汗吾脣茶丁妙寫犀
眞排方似欲驕華紳爲君走碾颺微塵羊腸聲乾行
隻輪柘羅栽絹素縷勻筩絲巧織霜後筠中貯刀圭
護百神乳花初幻人閒春計君別品尙絕倫完璧不
受敵國贖白虹夜氣千秋旻把玩自覺舌生津天衢
小草搜八垠蒙山顧渚亦懷新香歇色壞非法身妖
星森索避北辰不須會稗權羣臣龍翔鳳翥登巖宸
向來策勳自有人君其問諸修水濱

顧景蕃訪大年姪昆仲宿細柳軒夜論詩律輒
及老朽大年作篇調景蕃末章見稱過實且欲

盡借拙詩因次其韻爲謝

平生不依南路徐斗升寄活真魚濡了知浮名誰得
喪定自有數相乘除竭來雲外澗壑底槁項不減霜
松臞里中能詩二三友安步過我毋庸車要須文字
賞嵒霓未暇詠謔翻俚隅談天坐聽落鏐屑蹇步那
敢爭先驅顧侯風味更嚴苦家貧闕辦二韭菹龜腸
撐突五千卷底用曾粹箋蟲魚文如楚賓醉後稿下
筆應得銀盆斛近聞畫犯細柳壁酒闌罷歌卻驪駒
未妨仲子工料理珠琲餞歸懷不虛想當展卷疾讀
時新颺策策驚籊籊主人韻高絕少可客亦未易折

簡呼末章字字關老朽愛我如愛屋上烏吾家兄弟
俱人傑飽聞石氏多珊瑚莫云癡叔良不癡久諱筆
硯陪樵蘇諸郎胷中氣吐霧咳唾自可回春枯少年
得譽似劇勃他日不愧先楊盧儻見惡詩幸掩覆人
所罵譏鬼揶揄

大年復用前韻賦詩見贈亦次韻答之

燭龍停邊天步徐酒罷肉乾唇不濡漫郎憐我困蒸
潯爲送古風專掃除山頭逢君日乍午作詩瘦似山
人臞展緘初疑走甘露熟讀政似銚鸞車世閒癡兒
浪搖吻談空說有天一隅我今冥頑老不入十年此

路空馳驅邈來病發關藥裏枵腹日厭葵菽菹窗閒
敗毫積霜笥架上蠹帙繁書魚錢神無耳未易使斗
宿不靈那可料誰門有士料理得隨地駟駿吾家駒
三珠連樹價亡敵一鶚掣韝名不虛近聞掃徑避祥
暑竹枝青鞋一簾條枕中邯鄲夢不到戶外孔寶渠
自呼讀書瀾翻惜晝短幾欲挽斷三足烏鼎來說詩
劇有味令我坐享商之瑚斯文所善未中絕五字復
見李與蘇遺音當從牛鐸證廢律安取焦桐枯亦知
大國功九合一時盟會收微盧願持狗尾彊貂續未
妨舉手遭掄擲

謝人送炭

竈煙茶毗霜後林短椽脫煙烏不黔樵童豈惜龜兩
手入市論價輕千金向來幾作溝中斷漫滅青黃誰
過眼焉知負荷鑪錘功煨燼猶堪借餘暖夜闌吼空
風力豪平明雪山平屋高生柴帶葉冷不燄毀車充
薪車腳勞故人十縛起衰朽生遭寒灰撥紅獸解衣
扶續不足云那復區區論炙手

悼次東提刑姪

彊學初無敵臨民早有聲暮年猶補郡餘事及談兵
慷慨問高誼艱難見老成蓋棺今已矣百世漫空名

妙手剗百節劇談翻九河人皆期晚用君更患才多
世路方榛棘人豪正網羅重泉無日起天意定如何
次韻呂居仁主簿過韓存中侍郎所居
文章典雅如班固人物風流似謝安老去漫餘公論
在退休憚覺壯心閑松窗有月和書照雲物無羶禦
客寒冷淡且尋詩作話要看雷電勅仙官

送喻迪孺郎中知遂甯府

平時場屋漫聲名晚下瞿唐信此生萬里不應頻去
國一麾聊復爲專城送春杯酒侵行色上峽山家慰
客情坐遣官曹頻牢落說詩誰復似匡衡

以上東窗集

遊石橋

亂山雲冥濛脩徑石盤錯聲聞住世界窟宅遍岩壑
我行適過雨萬籟響天樂石梁定鬼設險滑不容腳
臨流輒生怖政墮葱韭惡猶忻曇花供尙及薦杯酌
分嘗不敢餘稽首謝發藥

天台續集

王庶

字子尙慶陽人崇甯中進士官河北經畧安撫
使忤秦檜安置道州卒宋史有傳

北巖

江連白帝浮日下山背青城出劒來

輿地紀勝

句濤

字景山成都新繁人登崇甯進士歷官史館修撰給事中知池州湖州宋史有傳

送孫太沖守懷安

雲頂峯岨奇金淵水清寫勉從山水遊切勿輕民社
輿地紀勝

何執中

字伯通處州龍泉人進士高等崇甯中累拜中書門下侍郎代蔡京爲相遷少師榮國公宋史有傳

巾山廣軒

曲檻小欄干登臨咫尺間望隨流水遠高共白雲間
亭柏僧歸路江風客渡灣覺來生羽翼疑是夢中還

天台
續集

高衛

鍾子歷陽人崇甯閒提舉湖南茶事靖康中徽
猷閣待制知平陽府建炎元年落職四年以顯
謨閣待制知洪州累官龍圖閣待制知撫州
江西通志

題碧落洞

翠竇連空跂可攀飛仙時下五雲端公車不暇頻遊
此今日纔來可謂難

廣東通志
金石畧

梅澤

字說之吳郡人崇甯時官陝西

過草堂望終南山

兩峰高插碧天寒雖得春風雪未乾謝屐自忘登覽
倦草堂終日凭欄杆

經樊川懷杜牧之

杜曲樹連蒼翠外終南雲暗有無中清詩妙句空貽
後不見樊川一老翁

行役述懷

世路侵尋老客顏黃埃遮眼鬢毛班青山未許教人去
白日何曾放我閑

又

明月一尊酒清風萬卷書南山山下地終欲卜休居
金石萃編

曹元振

崇甯間長樂縣丞

歸雲洞

石洞興衰亦有時因師移錫致雲飛雲心莫道全無

著應解從師去復歸

三山志

張伯昌

崇甯間知福清縣

靜軒

靈鷲峯寒碧玉堆紅塵斷處小軒開忘言更覺諸緣盡只有桃花點翠苔

三山志

張魴

崇甯時儒林郎知華原縣

五臺山謁真祠

仙翁舊隱寄巖扃千里蒙休會薦誠寂栗有餘民服

逸雨暘無爽氣和平簫笙緩緩陳觴豆耆艾紛紛逐
旆旌靈迹欲知垂不朽使君妙製刻初成

太守近作
靜應廟記

金石
萃編

張介夫

崇甯時通仕郎耀州錄事參軍

五臺山謁真祠

瞳瞳曉日照重城車騎翩翩布德誠綽約仙姿隨世
遠依稀樓觀與雲平神靈響答歆香火民庶歡呼擁
旆旌瑞雪呈祥和氣洽行看闔境報嘉成

金石
萃編

唐邁

崇甯甲申朝奉郎通判陝州

逍遙栖禪寺

圭峯大士翻經處雅俗今猶說草堂十頃筠篁環殿
閣百年松檜老風霜臨溪洗鉢憐僧野卷旃搜山意
盜藏時因捕盜至此試取禪詮滌吾慮蕭然心地頓清涼石
王需

崇甯時右侍禁耀州監倉

五臺山謁真祠

真人廟食占茲城欲乞豐年在至誠五馬貳車恭款
謁豐香烈火報登平犬鷄仙去遺丹竈鸞鶴飛來認

翠旌旣就金方留世了終聞玉帝錄功成

金石萃編

尙佐均

宣德郎充耀州學教授崇甯時人

五臺山謁真祠

踏霜投曉賽祠廷
豪竹繁絃妙吐誠
嘉會滿筵青眼
看遠山數點白雲平
淺霞滿日迎前騎
輕吹含煙獵
後旌好處畫工傳不盡
只憑詩句爲摹成

金石萃編

王允中

崇甯時朝散郎知耀州軍州事

五臺山謁真祠

縹緲仙臺俯郡城躬修祠事表精誠天邊霧卷山峯
出澗下風輕水面平不爲尋春馳五馬聊因勸課駐
雙旌六典刺史掌勸課風流別乘多才調彩筆先揮秀句成
金石萃編

何賁

將仕郎華原縣主簿崇甯時人

五臺山謁眞祠

清晨雪霽出東城躬款靈祠致克誠百品果蔬供薦
獻萬人簫鼓賀昇平暉暉曉日明臺殿獵獵霜風滿
旒旌碧瓦脩廊盡宏麗亦從民欲落新成

金石萃編

于巽

朝散郎通判耀州軍州事崇甯時人

五臺山謁真祠

千騎驂驪出禁城
真祠款謁罄虔誠
袴襦載路歌仁政
簫鼓喧天樂太平
殘雪未消山下路
和風先颺馬前旌
是日天氣晴暖幾有春意
爲民祈禱多靈應
來歲豐穰定有

成

金石萃編

高鈞

將仕郎富平縣主簿崇甯時人

五臺山真祠

二公祠事出重城宜有休祥答至誠林壑靜深經雪
後樓臺高下與雲平豐年簫鼓來仙宅晴日煙霞上
使旌黎庶歡聲自偕樂但聞高廩頌周成

金石萃編

朱京 厲有

句

雲生氈帽山頭雨日落琵琶峽口風

輿地紀勝

何氏德林山

野性樂閑適我州富佳山

資州

江山不負人人眼四時新古寺巖爲屋危峯竹是鄰

從來瀟洒地今日自由身

又

簫鼓旌旗簇錦韉
路人遙指翠微閒
使君乘興同民樂
猿鶴無心不礙閑

以上輿地紀勝

登尙清閣二首

望斷秦原日月寬
西來涇渭側山口
山憑誰喚取王摩詰
寫到孤口口滅翳

軍路名存跡已陳
斜陽今作幾家村
繚牆月轉華清

夢來破高陵渡口昏

湖南通志金石

大觀庚寅冬遊資州北巖

資州城郭雲山裏北巖正在雲山底翠壁嵌空抱日
明飛閣橫斜矗天起游人祇解愛城郭不知山底幽
人樂六月全無暑氣生三春亦有林花落蒼楠臥月
影如輪乳泉濺雹波生鱗利名付與百忙者早晚自
由無事身紅蓮幕下青城客五斗留人歸未得衙迴
不用展山圖直到巖邊看秋色

壬辰仲夏謁周文王廟

征西將軍念君王刻石巴山事渺茫千載衣冠付冥
寞路人無語奠椒漿

典章文物一朝完有子何憂事業難口使阿堅生肉

角至今遺恨碧峰寒

以上金石苑

束長孺


蘭陵人崇甯時宣德郎充陝西路提舉學事管

句文字

法相院

解鞍得枕畫堂空萬慮消沉午夢中莫說紅塵飛白
日且從綠竹借清風壁排琬琰詩無敵殿鎖丹青筆
有功又觸炎蒸出門去此生真愧坐禪翁

石刻



宋詩紀事補遺三十三男侍讀銜內閣中書樹藩校